

Di acuerdo cu IWFA, su Secretario, Robert Leeuwe Maneho di beach lo por perhudica hopi compania chikito

REACCIONANDO riba un invitacion cu DIP, a manda Robert Leeuwe, Secretario di Independent Watersport Foundation Aruba IWFA, pa asisti na un "encuentro informativo" dia 16 di februari ultimo, resulta cu mas grupo a haya e mesun invitacion aki.

Abogado di IWFA, mr. Anthony Ruiz, a reacciona cu e participacion cu DIP no por duna Robert Leeuwe so e derecho pa asisti n'e reunion aki, pero mester por duna tur otro operador di compania di deporte acuatico e mesun derecho aki.

Esaki pa motibonan di interesnan personal cu ta varia pa cada compania cu lo por keda perhudica na momento cu a introduci e "beach policy nobo" entrante 1 januari 2015.

Sr. Leeuwe, den su calidad di Secretario di IWFA lo por papia solamente riba interesnan comun di tur empresa di watersport y no riba casonan mas

specifico di cada compania individual.

P'e motibo aki mr. Anthony Ruiz a pone DIP na altura, cu pa motibo di interesnan individual lo por ta diferente, tur compania acuatico lo bin e reunion dia 16 di januari.

Hopi representante di e companianan a presenta dia 16 p'e reunion, pero hopi di nan a wordo nenga entrada.

E motibo duna dor di sra. Isabella Dammers di DIP y sr. Theo Oord no tabatatin suficiente stoel pa tur nan tur y cu aki tabata trata di solamente un encuentro informativo.

DIP a keda para riba cu ta solamente un par representante di e companianan por a drenta e reunion y finalmente a duna oportunidad na solamente 5 compania pa asisti n'e reunion. Esaki a keda haci despues di un promesa di parti di DIP cu despues di 2 siman lo bolbe organisa un encuentro y caminda DIP lo manda invitacion pa tur

compania cu ta opera un ke otro actividad acuatico.

Durante e encuentro cu a tuma lugar dia 16, Theo Oord a duna un resumen y splicacion di kico e beach policy nobo ta encera. Un cantidad di topico a keda trata manera e.o. deplasmamento obligatorio y den algun caso full cambio di sitio di algun di e companianan.

Den algun caso te hasta nan lo no tin permiso mas pa para riba beach y lo mester bay busca full un otro sitio. Segun sr. Oord tur esaki lo keda palabra na un otro ocasion cu cada un di e companianan afecta.

Durante e encuentro aki cada bes tabata bira mas cla cu e beach policy nobo, den e forma cu el a keda presenta awor, lo tin hopi consecuencia desbentahoso pa hopi di e companianan chikito.

Den un articulo den corant Diario di dia 16 di januari 2015, Parlamentario sra. Jennifer Ar-



ends-Reyes a bisa cu na ningun momento e compania estableci awor lo keda perhudica den ningun forma dor di e maneho nobo di beach aki.

E pregunta di IWFA awor ta con por ta posibel cu un Parlamentario ta declara algo asina y durante un encuentro cu DIP ta bin cu henter un otro storia. Mas importante t'e pregunta kico t'e opinion di Minister Otmar Oduber y Minister Benny Sevinger riba e topico aki.

Nan tambe ta pensa mescos cu sra. Arends-Reyes cu e maneho

aki no ta bay perhudica e companianan chikito den ningun forma?

Nos tin un interes comun pa na nomber di Aruba brinda un bon producto n'e bishitante. Pero no por t'asina cu companianan cu tin años di existencia cu a brinda un servicio pa hopi tempo, awor mester bay sufri daño pa motibo di un maneho nobo di parti di Gobierno sin tene cuenta cu nan interesnan y eventual obhecionnan, sr. Robert Leeuwe a finalisa bisando den un comunicado.